

**Folketingimi Inatsisinut Ataatsimiititaliamut allakkiaq:**

**Meeqqat 15-it 18-illu akornannik ukiullit paarsisussanngortinneqarsimasunit kinguaassiuutitigut atornerlunneqarnissamut Namminersorlutik Oqartussanit illersorneqarsinnaanerannik killiliinerit. Pinerluuteqarsimasut qitiusumik nalunaarsorneqartarfianni inunnik paasissutissat suliarineqartarnerat pillugu nalunaarummi meeqqanik pinerliisimanginnermut uppersaait pillugit maleruagassat.**

Meeqqanik pinerliisimanginnermut uppersaait tassaavoq pinerluuteqarsimasunik nalunaarsuiffimmit takussutissiaq meeqqanut 15-it inorlugit ukiulinnut kinguaassiuutitigut pinerliisimanagerit erseqqinnerusut pillugit eqqartuussutit aalajangiinernillu<sup>1</sup> allanik imaqartoq.

Pillaasarnermut inatsimmi peqqarniisaarluni pinerluuteqartarnermut aalajangersakkanik unioqutitsisimanagerit erseqqinnerusumik nalunaarneqartut pillugit eqqartuussutit allatulluunniit aalajangiinert pillugit paasissutissanik meeqqanik pinerliisimanginnermut uppersaait 1. februar 2017 aallarnerfigalugu aamma imaqartinneqalersimapput. Taakkuliuku eqqartuussutit il.il. peqqarniisaarluni pinerluuteqartarnermut tunngasut meeqqanik pinerliisimanginnermut uppersaait pillugit aqqissuussinermik siunertaaqqaarsimasup avataaniittut, malittuani meeqqanik pinerliisimanginnermut uppersaait atornerqartarfiata immikkoortua taanna isiginiarneqanngilaq, tassami taanna ajornartorsiummut Inatsisinut Ataatsimiititaliap tungaanit Retsudvalgimut (FT-mi inatsisinut ataatsimiititaliamut) maluginiaqqusamut malunnaatilimmik attuumassuteqarsorinangimmat.

Meeqqanik pinerliisimanginnermut uppersaait (pillaasarnermut inatsimmi peqqarniisaarluni pinerluuteqartarnermut tunngasunik unioqutitsisarnermut tunngasortaata oqaatigineqartup saniatigut) pinerluuteqarsimasunik nalunaarsuiffimmit takussutissianit allaanerussutigaa meeqqanik 15-it inorlugit ukiulinnik kinguaassiuutitigut pinerliinerit<sup>2</sup> aalajangersimasut kisimik tassani pineqarmata.

Aalajangikkap peerneqannginnermini ukiuni qassini pinerluuteqarsimasunik nalunaarsuiffimmi takuneqarsinnaanissaa pillugu maleruagassat immikkut ittut atuupput. Paasissutissat meeqqanik pinerliisimanginnermut uppersaaitit atugassat pinerluuteqarsimasunik nalunaarsuiffimmit takussutissiani allani paasissutissanut sanilliullutik ukiunik arlalippassuarnik kingulliullutik nalinginnaasumik peerneqartarput. Piffissat atuuffii nikerarput, apequtaalluni kanngutsaatsuliorneq kinguneqaatissiissullu qanoq ittoq pineqarnersoq.

---

<sup>1</sup> Eqqartuussutit aammalu akiliisitsinerit eqqartuussivimmi aalajangigaanngitsut (tassa akiliisitsissutit suliaq eqqartuussivimmut suliaannngortinnikkaluarlugu pineqartup akilissallugit aalajangigai) saniatigut taakku assersuutigalugu tassaasinnaapput unnerluussutit tunuartsinerit.

<sup>2</sup> Tassunga ilanngullugit ukiukitsunik qanigisarisani atoqateqarnerit, ukiukitsunik atoqateqarnerit allatulluunniit kinguaassiuutitigut atornerluinerit, kanngutsaatsuliornerit kiisalu meeqqanik pornolianik suliaqarneq, siammarterineq pigisaqarnerlu.

Naalagaaffiup politiivi pinerluuteqarsimasunik nalunaarsuiffik pillugu nalunaarut<sup>3</sup> naapertorlugu meeqqanik pinerliisimannginnermut uppersaatinik tunniussisartuupput. Sulisitsisup<sup>4</sup> qinnuteqarneratigut tunniussineq pisarpoq inuullu uppersaammik pineqartup akuersisimanissaa piumasagaataalluni.

Kalaallit Nunaanni pisortaqarfiit, suliffeqarfiit, atuarfiit peqatigiiffiillu atorfinni atuuffinnilu erseqqinnerusumik nalunaakkani sulisussanik atorfinitsitsinnginnerminni suliaqartitsinnginnerminniluunniit pineqartut taakku suliamik ingerlatsinermi meeqqanik 15-it inorlugit ukiulinnik toqqaannartumik attaveqartassappata meeqqanik pinerliisimannginnermut uppersaatinik piniartussaataanerannut maleruagassanik eqqussisoqarsimavoq.

Maleruagassat meeqqanik pinerliisimannginnermut uppersaammik piniartussaataaneq pillugu Inatsisartut inatsisaanni atuuttumiipput ("meeqqanik pinerliisimannginnermut uppersaat pillugu inatsit").

Oqartussaasup peqatigiiffiilluunniit il.il. meeqqanik pinerliisimannginnermut uppersaammik pissarsiniarnissamut qaqugukkut pisussaaffeqarnera Inatsisartut inatsisaanni taamaallaat maleruagassiorneqarpoq. Akerlianik meeqqanik pinerliisimannginnermut uppersaat sunik imaqassanersoq aammalu oqartussaasumut peqatigiiffimmulluunniit il.il. qaqugukkut taanna tunniunneqarsinnaatitaanersoq Inatsisartut inatsisaanni maleruagassiorneqanngilaq – aammalu maleruagassiorneqarsinnaanani.

Meeqqanik pinerliisimannginnermut uppersaatit imarisaat aammalu meeqqanik pinerliisimannginnermut uppersaatip tunniunneqarnissaanut suut piumasagaataanersut pillugit maleruagassat naalagaaffimmi oqartussaasunit aalajangersarneqarput. Maleruagassat taakku malillugit meeqqanik pinerliisimannginnermut uppersaatit taamaallaat inunnik meeqqanik 15-it inorlugit ukiulinnut toqqaannartumik attaveqartussanik imaluunniit meeqqat 15-it inorlugit ukiullit aalajangersimasumik akornanniittartussanik atorfinitsitsinermi suliaqartitsinermiluunniit atugassatut tunniunneqarsinnaallutik.

Taamaattumik oqartussaasup peqatigiiffiilluunniit il.il. inunnik *inuusuttuaqqat 15-it sinnerlugit ukiullit toqqaannartumik akornanniittartussanik imaluunniit taakkununga attuumassuteqartartussanik atorfinitsitsinissamut suliaqartitsinissamulluunniit* atatillugu paasissutissanik pissarsiniarnissamik kissaateqarunik tamanna pinerluuteqarsimannginnermik uppersaatinut "nalinginnaasunut" maleruagassat atuuttut malillugit pisariaqarpoq<sup>5</sup>.

---

<sup>3</sup> Pinerluuteqarsimasut qitiusumik nalunaarsorneqartarfiani inunnik paasissutissat suliarineqartarnerat pillugu nalunaarut nr. 881, 4. juli 2014-imeersoq (Pinerluuteqarsimasunik nalunaarsuiffik) kingusinnerusukkut allannguuteqartoq

<sup>4</sup> Imaluunniit atorfeqartitaanermi pissutsit pineqanngippata, pineqartumik suliaqartitsisoq.

<sup>5</sup> Oqartussaasutut peqatigiiffittulluunniit inunnut 15-it inorlugit ukiulinnut kinguaassiuutitigut pinerliinerit pinnagit pinerluuteqarsimanerilli allat pillugit paasissutissanik pissarsiniarnissamik kissaateqarneranni tamanna aamma atuuppoq. Tassa inunnut 15-it sinnerlugit ukiulinnut kinguaassiuutitigut pinerliinerit pillugit paasissutissat aammalu kinguaassiuutitigut pinerliinerit pinnagit pinerliinerilli allat (assersuutigalugu nakuusernerit) pillugit paasissutissat.

Aalajangiiffigisassatut siunnersuummut (UKA 2010/66) Inatsisinut Ataatsimiititaliaasimasup allannguutissatut siunnersuutitut saqqummiussaa Inatsisartunit 2010-mi akuerineqarpoq. Aalajangiiffigisassatut siunnersuutip akuerineqarnermisut iluseqartup nassataraa meeqqanik pinerliisimanginnermut uppernarsaatit pillugit inatsisip allanngortinneqarnissaanut periarfissiinissaq siunertaralugu Naalackersuisut naalagaaffimmi oqartussanut saaffigineqqullugit peqquneqarnerat, taamaaliornikkut meeqqanik pinerliisimanginnermut uppernarsaammik pissarsiniarnissamut pisussaaffik inunnik inuusuttuaqqanik 15-18-it akornanni ukiulinnik attaveqartartussanik atorfinitsitsinermi/suliaqartitsinermi aamma atuussinnaaqqullugu.

Meeqqat pinerlineqannginnissamut sapinngisamik illersorneqarnissaannut pisussaaffik meeqqanut tamanut ukiup inersimasutut naatsorsuussaalerfiup tungaanut tunngaviummik atuuttariaqartoq ataatsimiititaliaq isumaqartoq taamani Inatsisinut Ataatsimiititaliaq aalajangiiffigisassatut siunnersuummut isumaliutissiissutaani allassimavoq, aamma tak. Meeqqat pillugit isumaqatigiissut.

Inatsisinilli atuutsitsinermit ministereqarfiup Naalackersuisunut nalunaarutigaa naalagaaffimmi oqartussaasut Kalaallit Nunaannut tunngatillugu taamatut annertusisitsilersaanngitsut. Inuit inuusuttuaqqanik 15-18-it akornanni ukiulinnik attaveqartussat atorfinitsinneqarnerat/suliaqartinneqarnerat meeqqanik pinerliisimanginnermut uppernarsaatinik aqqissuussinermit ilannguneqarnerat inatsisunik atuutsitsinermit ministereqarfiup isumaa malillugu maanna aqqissuussinermik ilusiliinermi isiginiarneqartut atorunnaassapput. Taamaalilluni meeqqanut kanngunartuliortartut (tassa inuit meeqqanik atoqateqarnissamut inuuttunik kinguaassiuutitigut kajungerinnittartut) atorfinni suliaqarfinniluunniit meeqqanik kinguaassiuutitigut pinerliinissamut atornerlunneqarsinnaasuni atorfinitsinneqarnissaasa pinaveersimatinneqarnissaa aqqissuussinerup siunertaraa.

Inatsisunik atuutsitsinermit ministereqarfiup isumaanik issuaaneq malillugu tassani inerniliunneqarsimasorinarpoq inuusuttuaqqat 15-it 18-illu akornanni ukiullit meeqqanut kanngunartuliortartut eqqarsaatigalugit illersorneqarnissamik pisariaqartitsinngitsut: Inuusuttuaqqat 15-it 18-illu akornanni ukiullit meeqqanut kanngunartuliortartunit kinguaassiuutitigut pinerlineqarnissamut navianartorsiunngillat, tassa meeqqanut kanngunartuliortartut meeqqanik ukiukinnerusunik kinguaassiuutitigut kajungerisaqartarmata.

Pinerluuteqarsimasunik nalunaarsuiffimmit takussutissiaq taanna immikkut ittoq ulluinnarni meeqqanik pinerliisimanginnermut uppernarsaammik taaneqartaraluartoq taaguutip allap ilaannilu atornerqartartup, tassalu ”pædofili-attest”-ip (meeqqanut kanngunartuliorsimanginnermut uppernarsaatip) atornerqarnissaa tulluarnersaaq.

Tamanna Inatsisinut Ataatsimiititaliamit maluginiarneqarpoq.

Inatsisinulli Ataatsimiititaliaq isumaqarpoq meeqqat – tassa inuusuttuaqqat 15-18-illu akornanni ukiullit – kikkulluunniit inunnit meeqqamik paarsitinneqartunit kinguaassiuutitigut pinerlineqannginnissamut inuiaqatigiinnit sapinngisamik illersorneqartariaqartut.

Pingaartumik tassunga atatillugu inuk 15-18-inik ukiulimmik paarsitinneqartoq danskit pillaasarnermut inatsisaanni § 223-mik / Kalaallit Nunaanni pinerluttulerinermi inatsimmi § 80-imik (inummik 18-it inorlugit ukiulimmik qitornavissiarisamik, qitornassamik qitornarsiamilluunniit imaluunniit ilinniartitassanngortinneqarsimasumik kinguaassiuutitigut atoqatiginninneq)

unioqquitsinermit siusinnerusukkut eqqartuunneqarsimanersoq eqqumaffigissallugu immaqatunngavissaqarsinnaavoq.

Maannakkulli pinerluuteqarsimasunik nalunaarsuiffik pillugu nalunaarutip ilusilernerqarsimanera malillugu 15-18-inik ukiullit inunnit paarsisiminnit kinguaassiuutitigut atornerlunneqarsinnaanermut illersorneqarnissaat pinerluuteqarsimannginnermik uppersaatiit "nalinginnaasut" pillugit maleruagassat malillugit taamaallaat pisinnaavoq.

Atorfinni aalajangersimasuni il.il. atorfinitsitsinermit atugassatut pinerluuteqarsimannginnermik uppersaammik immikkut ittumik pineqartup akuersitinneratigut pisortani oqartussaasut maleruagassat taakku malillugit pissarsiniarsinnaapput. Pinerluuteqarsimannginnermik uppersaatiit taassuma imarissavai danskit pillaasarnermut inatsisaannik (aammalu nunatsinni pinerluttulerinermit inatsimmik) unioqquitsinermit atugassarititaasut malillugit eqqartuussutit, akiliisitaanerit aammalu unnerluussutit taamaatiinnarnerit pillugit paasissutissat. Aammattaq taassuma imarai eqqartuunneqarnikkut kiffaangissusiagaanermik pineqaatissiisoqarluni imaluunniit piginnaatitaaffinnik, assersuutigalugu biilersinnaatitaanermik arsaarinnittoqarluni inatsimmik allamik unioqquitsinerit pillugit aalajangiinerit. Paasissutissat pineqaatissiissutit naammassineqarneranit pinerluuteqarsimannginnermut uppersaammik takuneqarsinnaanerat ukiuni qulini atuutissaaq.

Pinerluuteqarsimannginnermut uppersaammik taamaattumik pissarsiniarnissamut peqatigiiffiit namminersortut il.il. periarfissaqanngillat. Inuk peqatigiiffiup atorfinitsinniagaa suliaqartinniagaaluunniit "namminerisamik pinerluuteqarsimannginnermut uppersaammik" pissarsiniaqqullugu takutitseqqullugu peqatigiiffiup qinnuigisariaqarpaa.

Namminerisamik pinerluuteqarsimannginnermut uppersaatiit taamaallaat imarai pinerluttulerinermit inatsimmik / pillaasarnermut inatsimmik aammalu ikiaroorartut pillugit inatsimmik<sup>6</sup> unioqquitsinermit eqqartuussutit akiliisitsissutillu pillugit paasissutissat. Paasissutissat namminerisamik pinerluuteqarsimannginnermut uppersaammik allassimasarput ukiuni marlunni-tallimani<sup>7</sup>.

Taamaalilluni ullumikkut meeqqat tamarmik ukiui apeqqutaatinnagit paarsisorisaminnit kinguaassiuutitigut atornerlunneqarnissamut assigiimmik illersorneqarnissaannut periarfissaqanngilaq. 15-it 18-illu akornannik ukiullit illersorneqarnissaat taamaallaat pinerluuteqarsimannginnermut uppersaatiit pisortatigoortuni namminerisanilu maleruagassat, meeqqanik pinerliisimannginnermut uppersaatiit maleruagassanut naleqqiullugit malunnaatilimmik sunniuteqannginnerusumik illersuisut malillugit pisinnaavoq.

Naluneqanngitsutut Inatsisinut Ataatsimiititaliap isumaa malillugu meeqqat tamarluinnarmik inunnit paarsisussanngortitaasunit kinguaassiuutitigut atornerlunneqarnissamut inuiaqatigiinnit

---

<sup>6</sup> Kiisalu palleeqqusinnginneq, sumiiffimmeeqqusinnginneq peersitaanerlu pillugit inatsit. Inatsit Kalaallit Nunaannut atuutinnilaq.

<sup>7</sup> Inaarutaasumik aalajangiisoqarnerani ukiut marluk kingorna akileeqqusissutit peerneqartarput. Eqqartuussutit allat inaarutaasumik aalajangiinnermit ukiut pingasut qaangiunneranni – taamaattorli paarnaarussivimmiittussanngortitaanerup/pinerluuteqarsimasunut inissiisarvimmiittussanngortitaanerup naammassineqarnerata kingorna aatsaat ukiut tallimat qaangiunneranni.

sapinngisamik illersorneqartariaqarput – tamatumani aamma meeqqat 15-it 18-illu akornannik ukiullit.

Pinerluuteqarsimasunik nalunaarsuiffik pillugu nalunaarutip maannakkut ilusilernerqarsimanera malillugu meeqqanik pinerliisimannginnermut uppersarsaatiniq pissarsiniarnissamut pisussaaffinnik oqartussaasunut, suliffeqarfinnut, atuarfinnut/ilinniarfinnut peqatigiiffinnullu assigiinngitsunut arlalinnut atuuttunik annertusaanissamut Kalaallit Nunaanni Namminersorlutik Oqartussat mattunneqarsimapput (taamaalillugu pisussaaffik sulisussanik atorfinitsitsinnginnermi suliaqartitsinnginnermiluunniit pineqartut taakku suliamik ingerlatsinerminni meeqqanik 15-it inorlugit ukiulinnik toqqaannartumik attaveqartassappata aamma atuuttussanngorlugu).

Ajornartorsiutip taassuma Folketingip retsudvalgianit (inatsisinut ataatsimiititaliaanit) eqqumaffigineqarnissaa Inatsisinut Ataatsimiititaliaamit kissaatigineqarpoq.